



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

TTAADC terenlok asoshi Niti
Ayog teyari bushitsü: Pradyot

SC-i Delhi excise policy ken o nung
Manish Sisodia anema kuli meshir

VOL. XX NO. 355 (ADOK 355)

DIMAPUR ROGONÜ (FRIDAY)

MONGPUTENI (OCTOBER) 06, 2023

₹ 5.00

Nagaland den arütsüa aliba Sivasagar district nung night curfew benoka lir

Dimapur, Mongputeni/Oct. 05 (TYO): Additional District Magistrate (ADM) Sivasagar, Assam ajanga Nagaland state den arütsüa aliba Assam tsütsü Sivasagar district 5 km belt nung anogo 60 asoshi night curfew tanaben benokshio.

Iba mera ya September 7, 2023 nungi alitsü aser mapang ya nikingdang 6:00 ako nungi anepdang 6:00 ako tashi alitsü.

ADM, Sivasagar ajanga sangdong ka nung ashiba agi, Assam/Nagaland arütsü alema

Sivasagar district belt nung nübur anema mapa tamajung inyakba/tashiyim amshiba/ozüing alema maparen balala inyakba nungi kumzüka alitsü mechi night curfew ya benok.

Night curfew mapang nisung kija/telok/gari senzütsü memelar, ta ADM Sivasagar ajanga ashi.

Ajisüaka Magistrate, Army/CRPF/Police aser duty nung aliba civil keddangsurtem iba tenokdangba küboki maiter, ta sangdong ajanga shia liasü.

Nagaland DGP-i temesepba mozü anema lungjemer nokdaksü ayongzük



Capital Convention Center, Kohima nung Brehostibarnü Nagaland nung temesepba mozü amshiba indang State Level Seminar ka aliba mapang Nagaland DGP, Rupin Sharma, IPS-i jembidang tangokba noksa nung angur.

Manipur: Meira Paibi lenir ka kidang bomb mereploktsü

Imphal, Mongputeni/Oct. 05 (Agencies): Bodhbar aonung Imphal East District kübok Khurai nung Meira Paibi Lup (Women Vigilante group) lenir ka kidang bomb ka mereplokja liasü.

Iba mechi Khurai Apunba Meira Paibi Lup (Women Vigilante of Khurai area) tir L Kananbala-i anir züngsemtem Khurai Lamlong bazaar, Imphal East District nung Brehostibarnü longkak aita mena liasü.

Iba smoke bomb ya L Kananbala'er kidang Bodhbar aonung 10:00 ako meta mereplokja liasü, ta Khurai Apunba Meira Paibi Lup

(KAMPL) nung lenir Y Utarani-i longkak aita tesem nungi osangbener dang ashi.

Bomb mereploktsüba nung nisung shinga meyuru saka iba mapa tamajung inyaker nungi telangzüba akhanger, ta Utarani-i ashi.

Ajisüaka tang tashi telok katia tenüing agia mali.

KAMPL ajanga Khurai Lamlong bazaar telung aser temeket nung October 4 anepdang 4:00 ako nungi October 10 aonung 10:00 ako tashi 'general strike' benoka liasü, saka iba sentong ya amajok akum, kechiaser lokti tentet aikati memolung.

KAS-i 8th Schedule nung Khasi oshi inoktsü akhanger

Shillong, Mongputeni/Oct. 05 (Agencies): Constitution indang 8th Schedule nung Meghalaya nungi Khasi oshi inoktsü asoshi akhangtsü atema Khasi Authors Society (KAS) ajaga pangzüng kar renemogo.

Iba pangzüng ya India indang Tir, Ato Kilonser aser Union Home Minister nung nem agütsüogo.

Mezüngbuba pangzüng nung, 8th Schedule nung Khasi oshi inokang ta khanga taoba mapang memorandum agütsüba dak

sendakba nung Union Home Minister indang office nungi telangzüba meshia lir.

Parnoki iba atema union minister kar ajurua lir, saka 2019 küm March ita nungi tenzüka Centre nungi osang kecha arua mali aser State sorkar nungia telangzüba kecha mali ta parnoki ashi.

8th Schedule nung Khasi oshi inoktsü temsüa aliba kuli aser osang tejangja agütsütsü KAS ajangasa telemtetba agi.

Minister Jacob-i Cooperation Department Directorate ki teyangludak semdang



Dimapur, Mongputeni/Oct. 05 (TYO): Cooperation Department keddangsurtem, NPWD engineers aser contractor tem lia Minister, PHED & Cooperation Department, Jacob Zhimomi-i Phergei, Meriema nung tang teyangludak Cooperation Department Directorate tasenba semdanga liasü.

Pai iba ki teyangludak aliba semdanga liasü, koba terenem leni arur. Iba ki ya 2012 küm nungi yanglu tenzüka saka ano merenem lir.

Iba ki renemtsü asoshi mapa inyaker nem senotsü tagütsütsü

aliba indang minister dang shia liasü. Pai NPWD engineer tem dang temolung agüja iba ki yangluba repringhimtsü tuyua liasü.

Iba tesem semdangba sülen Minister-i ken o angadanger agency balala aser contractor tem dang iba ki renema November 2023 nungsa semzüksü sentong yanglutsü shia liasü, kechiaser iba ki semzüka sülen ang Directorate of Cooperation Department Office shidak inyaksangshitsü aser iba project ya mapang talangka menua amshia arur.

Kohima, Mongputeni/Oct. 05 (TYO): Nagaland Police indang Director General, Rupin Sharma, IPS ajanga Nagaland nung temesepba mozü tebilemstü samadaksütsü asoshi Civil Societies, NGOs, Government agencies aser State Police tsüingta lungjemsü aser osangtsüsang lemsateptsü kanga tongtipang lir ta ashi.

Capital Convention Center, Kohima nung State Level Seminar on Substance Abuse in Nagaland and its Impact on Women sentong nung tesemdang tongti ka ama jembidang pai iba o ya shia liasü.

Nagaland DGP-i Civil Societies aser NGOs tem dang temesepba mozü shibelenba, ayokba mesüra achiba osang Police nem agütsütsü ajungshi, aser yamaji inyakba ajanga dang aibelener nem tapet temerenshi agütsütsü, ta shia liasü.

Ajisüaka pai nüburtem dang tzüzüng-ozüing pei sasa mamshitsü ashi aser temelaba makai yamaji inyakbaji ozüing

alema lir, ta pai tekumdangtsü shia liasü.

Temesepba mozü achi-ajemba indang awareness kaket reju nung agütsütsü kanga tongtipang aser iba temenen ajanga pei takum aser lokti dangi timtem bener arutsüba lanurtem nem angatetdaksütsü, ta pai ashi.

State nung temesepba mozü amshirtem azüoktsü aser yaritsü tesem kanga ajema lir, anungji National Women Commission (NCW), Nagaland State Commission for Women (NSCW), aser Social Welfare Department ajanga iba tebilemstü bentetta rehab center tem tajungba kumdaksütsü Nagaland DGP Sharma-i ayongzük.

A Asholi Chalai, Joint Secretary NCW ajanga Nagaland nung temesepba mozü amshiba aser iba ya ajanga loktiliba aser talisa tetsürtem dak kongshiba indang tebilemstü lemsatepa liasü.

Paia school aser college tem nung awareness campaign

agütsütsü nungdaker, nüburtem nem tashi agütsütsü, temesepba mozü amshitem yaritsü, rehabilitation facilities, mental support, economic empowerment aser tajungtiba nung azüoktsü asoshi tetenzükang yaritsü nungdak, ta ashi.

Iba seminar ayongzükba nükjidong NSCW indang Chairperson, W Ngingeih Konyak-i rateta ashi aser Deputy Director, Social Welfare, Imkongzenla-i temesepba mozü amshiba azüoktsü asoshi Department-i shilem agiba indang lemsatepa liasü.

Iba seminar nung menden NSCW Member Kekhrienuo Meyase liasü aser New Capital Baptist Church Phezoucha, Kohima indang Pastor, Bendangtemsu Jamir-i sentong tenzüka sarasadem.

Iba seminar ya Nagaland State Commission for Women ajanga National Women Commission teyari nung ayongzükba liasü.

Dimapur nung Measles & Rubella asoshi tanurtem nem vaccine agütsütsü

Dimapur, Mongputeni/Oct. 05 (TYO): Linük ajunga den külemi Nagaland nunga 2023 tashinung Measles & Rubella (MR) samadaksütsü nükjidong yur meranga inyaker.

Measles ya nisung ka nungi ka dak kanga mela menar, mopung nung jajaba tashidak ka lir, koba virus ajanga adokdaksür aser iba yagi temang nung timtem tulu agütsür aser tasüa asür.

Iba tashidak yagi nisung mashi dak kongshir saka talisa tanurtem dak tali atemer. Measles yagi tango sashiba tezü nung kongshir aser temang sünga prokshia aor.

Measles agi temang metar, aketer, teni atanger aser temang sünga ara adokdaksür. Measles ya alima nung temelatiba menatepa aoba tashidak ka lir, kong iba tashidak agi menepa alir teni mesüra tango nung (aketba mesüra hajiba) nungi menar mesüra measles alir kati tango sazüka yokba saokba nungia menar.

Iba virus ya mopung mesüra 'infected surfaces' nung ghonda ana tashi yakyaka alir.

Rubella ya nisung ka dak

nungi ka dak menatepa aoba tashidak wara ka lir. Rubella virus agi menepba tanur aser tain tem temang tera metar aser ara adoker, mashisa kumli iba tashidak agi menepa nu menden nung tanur raksar, asür, anojungi nu menden nung lia tanur asür mesüra kinü tanur dak congenital malformations, koba dang congenital rubella syndrome (CRS) ta ajar, iba timtem keta alir.

Rubella virus agi menepa alir ka hajiba mesüra aketba mapang mopung nung tzüjung prokshiba nungi menar. Measles mesüra rubella nungi kumzüksü mesüra dangar dak menaloktsütsü nungi kuzüksü asoshi lenmang tajungtibaji vaccine agitsüba ya lir.

Vaccine agiba nung timtem kecha mali aser iba vaccine yagi temang nung virus den rarar.

Dimapur district nung tajungba meitba ajanga temang metaa ara adokba 112 liasü aser item rongnung nisung 53 dak Measles aluba jangjatet aser nisung asem dak Rubella putet.

Ministry of Health and Family Welfare ajanga MR Elimination samatsütsü asoshi sentong

yangluba nung ajemdaker Dimapur CMO office ajanga iba tashidak tali putetba tesemtem nung special immunization response tenzükogo aser itemji Signal Angami, Darogapathar, Purana Bazaar, Duncan, Burma Camp aser Kuda indang Health Units tem kübok lir.

Iba special immunization drive nung ita toku (9) nungi küm pongu (5) tsüingta tanur ajunga nem taoba mapang mozü agütsür liaka MR vaccine dose ka-ka agütsütsü.

Shia aliba tesem nung ita toku nungi küm pongu tsüingta tanur ajunga nem MR vaccine doce ka-ka agütsütsü.

Iba atema tsürabor temi ASHA, Anganwadi Worker mesüra ANM den osangtsüsang agiteptsü akok.

Maneni department ajanga shia aliba colony chairperson, GBs, arogo, CSO, sendaktepa aliba department aser nüburtem dang iba maparen takok ngua tanurtem kumzüktetsüba tashidak nungi kumzüka ayutsü asoshi yariteptsü ayongzükba liasü.

(Maneni tapak 2 nung...)

NU Kohima Campus nung Hindi indang National Seminar tenzükogo



Dimapur, Mongputeni/Oct. 05 (TYO): North East India nung Hindi sayuba dak sendakba nung Nagaland asoshi anogo ana National Seminar sentong October 5, 2023 nü Lecture Hall, Department of English, NU Kohima Campus nung Nagaland Angh aser Chief Rector Nagaland University, La Ganesan-i moaja liasü.

Iba sentong ya NU Kohima Campus aser Central Institute of Hindi, Agra lungjemer ayongzuka liasü.

Iba sentong nung tongti tesemdang ka ama jembidang, 'human values' shidak renloktsü asoshi shisaliok ya tongtipangtiba lir aser iba ya ajanga lokti tajung yanger aser linük tashi tait kumdaktsür, ta Nagaland Angh, La Ganesan-i ashi.

India nung shisaliok senmang tajung indang bilemteta jembidang, küm meyirijang aika India-i alima nem tesangwa yalokja arur, ta pai ashi.

India nung tashi tametet aser education system tajung aliba ajanga tashi-temeteter aika adokogo aser parnoki astronomy, mathematics, medical sciences, grammar, philosophy, yoga, engineering,

architecture aser kisü-jensüba nung alima yariogo ta ashi.

Yimtenren aser tatalokba balala ajanga akhi India nung education system tajung samatsüogo, ajisüaka 2020 nungi amshiba NEP tasenba yagi tesüiba konang tanaben bener arutsü aser iba yagi asen tetsü oshi aser nüburtemi jembiba oshi nung rangloker, ta NU indang Chief Rector-i ashi.

Pai iba sentong nung shilem agirtem dang Hindi ya oshika ka dang masü saka asen linük ajunga alentepba süngzü ka ama züngshitsü ayongzük.

Oshi-oben ya kati ka den jembiba kisung masü saka yangi sobaliba, yimsü-yimpong, puti otsü aser asen maitsü lir, aser alima nung aliba meimchirtem Hindi yagi oshi-oben tawa nung apu latsür, aser telungjem adokdaktsür, ta Nagaland Angh-i ashi.

Nagaland nung Hindi oshi jembitsü sangdong dang Nagaland nung sobaliba oshi tajung mesamadaktsüsüla aser India den sendakteptsü asoshi apu ka ama amshitsüla, ta pai nenshia ashi.

NU indang Chancellor, Dr Samudra Gupta Kashyap-i iba sentong nung jembidang Hindi ya koda tongtipang lir, ta asüba indang angatetdaktsü aser

tangatetba tajung nung Hindi oshi ajungkettsü ajungshia liasü.

NU indang Vice Chancellor, Prof Jagdish Kumar Patnaik-ia state tesem ajungalen Hindi oshi ainba indang jemi aser nüburtedang Hindi oshi angazüka jembitsü merangtsü ayongzuka liasü.

Kasa sentong nung Prof Nand Kishore Pandey aser Asst Prof. Dept. of Hindi, Dr Brijesh Kumar nungeria jembia liasü.

Dean, School of Humanities and Education, Kohima Campus, Prof Buno Zetsuvi-tarur pela agizükba o jembidang PhD Scholars 12 lir aser item rongnung Naga nung pezü lir aser parnok NU kübok degree azünger, ta ashi.

Iba seminar nung linük nung aliba kaket reju balala nungi Researchers aser Scholars temi shilem agir.

Iba sentong nung menden Dr Neha Rawat liasü aser NU kaketshir temi temeja ken ka aten.

Vice Chancellor, Kohima Campus, Prof G.T Thong-i salem o ashi aser Dr. Munni Chaudhary, HOD Hindi Department ajanga melepzüng o jembia liasü.

Süngtiyala C. Imchen-i SAG-AS nung state tenüng nung shilem agitsü

Mokokchung, Mongputeni/Oct. 05 (TYO): Arishi küm 23 tain Süngtiyala C. Imchen-i Nagaland state tenüng nung October 8, 2023 nü SAG-AS, Goa nung agitsü aliba National 'Red Run' Marathon nung shilem agitsü asoshi tanü October 5 nü la apusoa ogo.

Süngtiyala C. Imchen ya Jubilee Memorial College nung B.A 5th Semester azünger aser JMC nung RRC züngsem ka lir. La ya Mangmetong nung Dilong ward, Mokokchung nung alir Chubatoshi L. Imchen'er jala lir.

La ya tawa National AIDS Control akhüm nung Kohima District Athletics Association Nagaland den yaritepa Nagaland State AIDS Control Society (NSACS)-i Youth fest-state level marathon race ayongba sentong nung



Süngtiyala C. Imchen

tetsürtem rongnung mezüng jenjang ngutet.

"Nagaland atena or shilem agitsübaji ibai ni asoshi mezüngbuba asütsü, jangratema bilemer aser iba maangka tulu ngutetba asoshi kanga pelar", ta la Goa-i apusotsüba Airport nung alidang iba osangbeneri la den mobile phone ajanga jembidang metetdaktsü.

Süngratsü nung Denture free camp agia liasü



Dimapur, Mongputeni/Oct. 05 (TYO): Indian Dental Association (IDA) Nagaland state branch, Mokokchung Unit ajanga International Day of Older Persons nungtem nung October 4, 2023 nü Süngratsü yimdak Denture free camp ka ayongzuka liasü.

Iba health camp ya Mokokchung district representative, Dr. Kenzie Theja

lenisüba kübok Mokokchung district nung sorkar aser jurila Dentists temi agia liasü.

Association ajanga iba ama mapa tajung inyaka yimdaklir nem teyari agütsüba asoshi putu menden ajanga pelaba lemsatempa liasü.

Iba health camp nung Dentures 26 inoktsü, kar agizüktsü aser mozü angati agüja liasü.

Dimapur nung Measles & Rubella asoshi tanurtem...

(TAPAK 1 NUNGI...)

Nüburtemi meteta alitsü atema session sites asoshi anogo aser tesem tejangja yamai alitsü:

Health Unit	Date of vaccination	Name of Locality	Location	Time
SIGNAL ANGAMI SC	7 October 2023	Signal Angami A	Sub Centre	10:00 AM
	14 October 2023	Kevijau	Living Stone School	10:00 AM
DAROGAPATHAR SC	9 October 2023	Naharbari	Anganwadi Centre-A	10:00 AM
	10 October 2023	Darogapathar	Sub centre	10:00 AM
	11 October 2023	Master Colony	Nagamese Baptist Church Compound	10:00 AM
	11 October 2023	Naharbari	Anganwadi Centre -C	12:00 Noon
	13 October 2023	Darogapathar	Anganwadi Centre -B	10:00 AM
PURANABAZAR HWC	6 October 2023	Darogajan	Anganwadi Centre	10:00 AM
	7 October 2023	Padampukhri	Anganwadi Centre	10:00 AM
	9 October 2023	Puranabazar A	Anganwadi Centre	10:00 AM
UPHC DUNCAN	9 October 2023	Puranabazar B	Anganwadi Centre	10:00 AM
	6 October 2023	Churches Colony	Chairman Compound	10:00 AM
UPHC Burma Camp	9 October 2023	Khermahal	Colony Compound	10:00 AM
	6 October 2023	Mao Colony	ASHA residence	9:00 AM
KUDA HWC	6 October 2023	Sangpangtu	ASHA residence	9:00 AM
	7 October 2023	Sumisa	Council Hall	9:00 AM
	7 October 2023	Paيرا	Council Hall	9:00 AM
	6 October 2023	K.Kire Colony	Health and wellness centre	10:00 AM
KUDA HWC	7 October 2023	Phaipijang	Community Hall	10:00 AM
	7 October 2023	Lungwiram	LP School	10:00 AM
	9 October 2023	Master Colony	Community Hall	10:00 AM
	10 October 2023	D Colony	Anganwadi Centre	10:00 AM
	10 October 2023	Grace Colony & SP Colony	Anganwadi Centre	10:00 AM
	11 October 2023	Kuda B	Anganwadi Centre	10:00 AM
	13 October 2023	Kuda A	Anganwadi Centre	10:00 AM



Noklak nung Khamniungan nung Tsokum benjongmung nung MLA aser Chairman, DPDB Noklak, P. Longon-i o jembidang tangokba noksa ka yangi angur.

Watsu Mungdang-i mangyim jashi lemsateper

Mokokchung, 5th Oct (TYO): Sb. Imnayachet kanga dang takoksa tulu. Pa ama kanga dang teyakyak, Mangdang aketba lanur tajung yamai arishi kara tembangba ya kanga dang sasar aser jashia belemer. Tsüngremi asür tsürabur aser kinungertem nem iba asüku aser mangyim mapang tesünep aser shi nung tashi tasen agüjang, ta tir-isa metetdaktsü.

Ao kin lanurtem anishitsü asoshi shimtetba nübu ka yamai

atlokba ya asen lima asoshi kanga dang takoksa tulu. Pa ama kanga dang teyakyak, mangdang aketba lanur tajung yamai arishi kara tembangba ya kanga dang sasar aser jashia belemer. Tsüngremi asür tsürabur aser kinungertem nem iba asüku aser mangyim mapang tesünep aser shi nung tashi tasen agüjang, ta tir-isa metetdaktsü.



New Delhi, October 05, 2023: Delhi excise policy ken o dak sendakba nung ED-i AAP MP, Sanjay Singh apuba anema AAP züngsemtemi BJP headquarters, New Delhi nung longkak aйдang tangokba noksa nung angur.

State pongu nung assembly election atema EC-i senden ayonger

New Delhi, Mongputeni/October 05 (Agencies): Kobi melii state pongu nung assembly elections agitsü atema sangdong agütsütsü jakdang Election Commission of India (ECI)-i Hokolbar aonung election observers senden ka ayongzükogo. Iba senden nungji state pongu nung election junga agitettsü atema asalentong yanglutsü aser model code junga benoktsü atema jembitsü. Brihostibar tashi nung Election Commission nungi

ketdangssertemi state Mizoram nung legislative ponguprongla- Rajasthan, assembly kümsük taküm Mizoram, Madhya Pradesh, December 17 nü tembangsü. Chhattisgarh aser Telangana Iba state nung tang Mizo semdanga election atema National Front sorkar lir. terenemshiba jenjang Telangana, Rajasthan, asadangogo. Chhattisgarh aser Rajasthan Taruba anogo ishika state tem nung legislative tsüngda election commission-i assembly kümsük sangküm state pongu nung assembly January ita nung anogo balala election agitsü anogotem nung tembangsü. sangdongtsü. Tang Telangana nung Bharat Rashtira Samithi (BRS) Taruba ita ana- November- December nung Chhattisgarh, sorkar lir, Madhya Pradesh, nung BJP sorkar lir aser Madhya Pradesh, Telangana, Chhattisgarh o Rajasthan na Mizoram aser Rajasthan state nung election agitsü. nung Congress sorkar lir.

SC-i Delhi excise policy ken o nung Manish Sisodia anema kuli meshir

New Delhi, Mongputeni/October 05 (Agencies): Delhi excise policy ochimashi ken o dak sendakba nung Brihostibarnü Supreme Court-i bushisüngdangba agency tem dang AAP lenir, Manish Sisodia anema kuli agüjang, ta tuyuogo. Brihostibarnü Supreme Court-i Enforcement Directorate (ED) aser Central Bureau of Investigation (CBI) na dang, "Kuli kong lir? Nenoki ataloka arubatem aika metetdaksüogo. Ozüing alema inyakba kulitemji kong lir?," ta asüngdang. Justice Sanjiv Khanna aser Justice SVN Bhatti nati akümba Supreme Court bench-isa, iba ochimashi ken o nung Manish Sisodia-i shilem magi ama court-i reprangteter, ta metetdaksü. Taoba mapang Delhi nung deputy chief minister, Manish Sisodia-i bail temepishiba agütsüba ken o angadangba mapang nung Supreme Court-i ED aser CBI dang, excise policy ochimashi ken o nung tai tonglokja alir shishilembar, Dinesh Arora-i Sisodia anema jembiba dak alaka Sisodia anema kuli kong lir?, ta asüngdang. Supreme Court-i, "Iba ken nung Manish Sisodia-i shilem magi ama reprangteter. Iba

ken o nung Vijay Nair lir saka Delhi exceise ken o dak sendakba nung tang tashi nung ED-i AAP lenir asem puogo. Tamalen ED-i taoba mapang Delhi minister ana- Manish Sisodia aser Satyendar Jain na pua liasü. Yashi Singh-i video ka ajanga party nung inyakertem dang, "Ni süadoktsü melunga lir saka metsübuttsü. Ni Ato kilonser Narendra Modi, Gautam Adani aser parnok ochimashi anema aiben jembia arur. Adani ochimashi anema ni ED nem ken o aika agütsüogo, ajisüaka parnoki kecha meinyak. Ajisüaka tanü ajungbena ED-i ozü ki mita reprang. Parnoki kecha mangu, ajisüaka parnoki ni apur," ta metetdaksü.

Bodhbarnüa Delhi excise policy ken o dak sendakba nung Enforcement Directorate-i AAP MP, Sanjay Singh'er ki mita aoba sülen puogo. AAP lenir, Sanjay Singh October 10 tashi ED ket nung ayutsü.

LIST OF SELECTED PARTICIPANTS FOR STATE HANDLOOM EXPO AT URBAN HAAT, DIMAPUR, NAGALAND. W.E.F:- 09th OCTOBER TO 22nd OCTOBER 2023.

1	Nagaland Sales Emporium, Kohima	Kohima, Nagaland
2	Nagaland Sales Emporium, Mokokchung	Mokokchung, Nagaland
3	Projolita Hazarika	Jorhat, Assam
4	Binadani Pathak	Jorhat, Assam
5	Kalpa Jyoti Borah	Kamrup, Assam
6	Bhanu Ingjal	Kamrup, Assam
7	Rupali Phangcho Boro	Baksa, Assam
8	Ashini Ingjal	Kamrup, Assam
9	Bandana Boro Kro	Kamrup, Assam
10	Sonamai Deuri	Jorhat, Assam
11	Maa Kali Creation	Kamrup, Assam
12	Bikram Das	Kamrup, Assam
13	Santanu Pathak	Jorhat, Assam
14	Rajbala Deuri Bora	Kamrup, Assam
15	Five Sisters	Molungkimong, Nagaland
16	Bahon Ajun	Longleng, Nagaland
17	Paul Nekong	Mon Town, Nagaland
18	Liro Medem	Mokokchung, Nagaland
19	Aloto Yeptho	Mangkolemba, Nagaland
20	Imnanungsang	Kohima, Nagaland
21	Helitoli	Zunheboto, Nagaland
22	Washimelia Imsong	Akhoya Village, Nagaland
23	Yimlichaden	Longleng, Nagaland
24	Chonbeni	Wokha, Nagaland
25	Jungshimanen	Mokokchung, Nagaland
26	Inali T	Zunheboto, Nagaland
27	Lily Sote	Kohima, Nagaland
28	Ivuto	Zunheboto, Nagaland
29	Lonyitsou Wezah	Phek, Nagaland
30	Moachila Telongjem Unit	Changtongya, Nagaland
31	Vinoli Awomi	Zunheboto, Nagaland
32	Kvusolo Kent	Tseminyu, Nagaland
33	Khourasa	Phek, Nagaland
34	Lepfusa Katiry	Phek, Nagaland
35	Imsumongla Longkumer	Mokokchung, Nagaland
36	Kazungtula	Mokokchung, Nagaland
37	Jenenle Kent	Kohima, Nagaland
38	Moabena	Mokokchung, Nagaland
39	Akokla Imsong	Changtongya, Nagaland
40	Tiamoa Tzudir	Tuli Town, Nagaland
41	Longrila Anar	Kiphire Town, Nagaland
42	Bendangnaro	Changtongya, Nagaland
43	Tiajungla	Akhoya Village, Nagaland
44	Ngipwang Konyak	Mon Town, Nagaland
45	J. Amenla Jamir	Kohima, Nagaland
46	Tohoni Handloom Unit	Zunheboto, Nagaland
47	Bendangsangla	Changtongya, Nagaland
48	Imolemia	Yimjenkimong Village, Nagaland
49	Putuyangla	Akhoya Village, Nagaland
50	Saraholi Yeptho	Niuland, Nagaland
51	S. Akanglemla	Mokokchung, Nagaland
52	Khelito	Mokokchung, Nagaland
53	Beryl V Zhimo	Zunheboto, Nagaland
54	Medonuo	Kohima, Nagaland
55	Yohan Konyak	Mon Town, Nagaland
56	N. Kaheli	Zunheboto, Nagaland
57	I. Shaushom Phom	Longleng, Nagaland
58	Razouselu Chizo	Phek, Nagaland
59	Lipongla	Kiphire Town, Nagaland
60	Kazhevi	Zunheboto, Nagaland

NB:
 1. The selected participants are directed to report to the exhibition ground at Urban Haat, Dimapur at 6:00 A.M
 2. The participants are directed to keep their exhibits in their stall under lock & key. The office shall not be held responsible in case of any losses/theft.
 3. Selected participants must display genuine products with full stock, failure to do so will result in revoking their participation from the exhibition.
 4. Selected participants are informed to reach at scheduled time. In case of failure, their participation in the event will be revoked.
Managing Director
NHHDC Ltd.



बैंक ऑफ बड़ोदा
Bank of Baroda

KOHIMA BRANCH
Main Bazar Road, Near Old Taxi Stand, Kohima- 797001
Email: Kohima@bankofbaroda.co.in

Kiojen ayoktsü atema Sale Notice
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Rule 6 (2) 8t 8 (6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice.
 Public aser talisa sen apur(tem), Mortgagor (tem) aser Guarantor (tem) nem iba sangdong agütsür, Secured Creditor dang mortgage/charge asüba tsünglanglen shia aliba kiojen State Bank Of India nung Authorized Officer-i agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" tsünglanglen shia aliba account/s nungi sentsüh alangzüktsü atema ayoktsü. Sen apur(tem)/Mortgagor (tem)/Guarantor(tem)/alangzükta aliba kiojentem/sentsüh/Reserve Price/e-Auction anogo aser mapang, EMD aser Bid Increase Amount tsünglanglen metetdaksü-

Sl/ Lot No.	Name & address of Borrower/s / Guarantor/ Mortgagors	Short description of the immovable property	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	Mr. Hyungwalo Jeshing Rengma, R/o- H. No. E/A-1/01, Agri Colony, Opp. Stella Higher Secondary School, Kohima, 797001, Mr. Kewetso Mero (Guarantor) New Minister Hill, Kohima- 797001.	Land and building measuring 1500 Sq.ft covered by Patla No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. Bounded : On the North by: Property of Seyiekhoh Angami, On the South by: Property of Hyungwalo Jeshing, On the East by: Nullah, On the West by: Property of Seyiekhoh Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: 08.11.2023, Time: 03.00 pm Start Time: 03.00 pm End Time: 06.00 pm	1. Reserve Price: Rs. 4,77,16,733.00/- 2. Earnest Money Deposit: Rs. 47,71,673.30/- 3. Bid Increase Amount: Rs. 10,000/-	Physical Possession	27.10.2023 at 1.30 P.M. and 02.11.2023

Iba kiojen ayoktsü telatetbatem tejanga metetpelatsü atema yimlibilema website link <https://www.bankofbaroda.in/e-auction.htm> and <https://ibapi.in> nung reprangang. Iba dak alia bid asütsüurtemi Authorised Officer den Mobile No: **81199 22922** ajanga tongteprateptsü akok.
 Date: 06.10.2023
 Place: Kohima
Mr. K H Zhimo
 Authorised Officer
 Bank of Baroda



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI (OCTOBER) 06, 2023

Gari lendong onsara ajurur !

Tang mapang tatsüka tsüngda ya asen lima tesem balala nung gari lendong atalokba nung nisung taküm samaba osang angashir. Ano, tali tejashitsü kaji, gari lendong nung asürtem ya teimbaka lanurtem asüba osang angashir. Atangji, kümdangyonga alima yimya asünungji tiabai lemkütsüa aliba anogo nungbo lendong timtema mepaidoktettsü. Ajisüaka, alima nung ya asenoki kümdangba aser mapang shitak nung mapatem shitak inyakba ajanga lendong timtem aika nungi meteta aser memeteti kümzüker. Item rongnungji gari lenmang shitak yangluba, gari tejen mekümdaktsüi shitak ayuba aser gari kümdanga anibatem asütsü. Asenok tia majung kaji, Nagaland state ya yimten temzüng ozüng amshia ketdangsüba lima ka masü saka maparen ajak tangatettep agi inyaka aoba lima ka lir. Iba jagi Nagaland nungbo mapai maoyonga ita asen agizüka agitetter aser ozüng raksayonga temerenshi mangur. Iba jagi gari kaket shitak maliyonga Nagaland nungbo senzütetter. Aji oda, Naga nung gari aika Assam ajangabo mesenzütetter, anungji Assam majangi Nagaland nung dang senzüba garitema lir. Iba jagi dang masü saka asenoki government mapa nung teinyakdak purtemi government gari mashimashi amshiba indang jembir, saka ibajibo yutsür government mapa nungi anener külena, tarendaktsü kaji police gari dena, government mapa nungi anenertemi amshiba angur. Item kisüngji mita oagi azüoktet nung, gari lendong ajurutsüba aika nungi memeteti asenok kümzüksü. Ano, gari lendong ajurubaji gari anirtem mekümdangba kisüng agi masü saka lenmang yanglurtemi lenmang shitak meyangluba agia lendong aiben ataloker. Gari lenmang yangluba ya tapi agi yanglua aoer masü saka surveyor aser engineer-temi akok tashi gari lendong majurutsüsa lenku ajak jungjunga asadanga repranger külenang yangludaktsür. Ajisüaka, asen lima nungbo gari lenmang yanglutsüba mapa lemkütsürbo teinyakeri shitak inyaker asü meinyaker, itemji züngzünga repranger mali, teinyakeri kechi koma inyakdir ojang ta ser tangatettep nung timtem arema jajar. Iba jagi, ashiko, lenmang lenku shitak tudoka inyak nungbo gari lendong mataloktsüba ka toa ataloker alitsüa akok mesüra lenrülen gari lendong atalok nunga tsükdaka yur kümzüksüsa 'railing' shitak enoka alinungbo gari lendong majurutsüba ser nung ajurubatem a litsüa akok. Iba amaji, gari lenmang lendi ongken kümer tzü atsünga mali nungbo lendong majurutsüba ser nung ajurubatem a litsüa akok. Aji oda, gari lenmang yanglurtemi lenmang teyangludak nung lishi aser auyi agi gari jaja majung meyutsü nungbo gari nung senzürtema lendong timtem majurutsüba ser nung ajuruba otsütema aika alitsüa akok. Itemji dang masü saka gari karaa mejajadaktsütsü atema yangluba 'break breaker'-tema mashimashi ajungketa masü saka gari tanemi ajanga otettsüsa yanglutsü nungbo timtem-takoksa majurutsüba ser nung ajuruba timtem anogotema karibo ajangshir alitsü. Atangji, lendong ajuruba kuliji tatemtsü kabosa alitsü, saka tatemtsüji nisungtemi shitak meinyakba ajanga atalokba kulitembo masütsüla. Engine osetji, kechi oset südirsüaka kenübo raksatsü, anungji garia khenkhenbo break mesüra steering mapa meinyaki akümtsüa akok. Iba ama mapang nunga gari anishir tajungibo kümzüktetter. Aji oda, garisa asüyonga nübertem mener jajaba bus aser taxi garitem ya balaka gari kibur, gari anishir aser government nung gari mita reprangertemi kanga nendaka mita reprangtsü aser amshitsü nungdaker. Item ama anogo shia nübertem mener jajaba garitem anishir karbo yi jemer apusoba aser len tom nunga anener yi ajemba osangtema angashir. Itemji tarendaktsüka aser shisabolutsüka lir. Atangji, alima nung kong aser kechi mapa nung südir süaka tangatettep nung alibaji junger, ajisüaka gari shitak masü ser tangatettep nung jajadaktsüba, lenmang shitak meyanglu ser tangatettep nung renemdaktsüba, gari meshitak aniba ajanga lendong atalok ser nung tangatettep agi tepuokdak anogo kata mayu taidok agütsüba, gari lenmang junga anepalu masüba agi gari raksa aser nisunga yiru aser tasüa asü saka tangatettep nung 'election nung sen onsara endokba agi' ta ser yutsüba agi, ashiko, paidoktettsüba gari lendong-a dena mepaidoktet ser pei dak dena ataloker asütsüa akok.

OLEMSABANG

"RISHIKANGSHI" ASER "METANGDANGI": Kaket züluri item tasüngdangba asüngdanga research agitsü nungdaker

~ Wati Longchar

(Yashi adok nungi...)

Ano "Arogo" ta kodang missionarytemijembi, parnoki koma angteta amshi? Iba putu nung Baptist dak alaka tanga protestant missionarytemi koma angatet? Missionary putu, letep-tsüngtep mapang, mangsa aliba putu, modern education marudang, Molungkimong, Molungyimsen, Aortemi "arogo" ta asübaji koma angatet? A,B,C, 1,2,3 sayuba, ken sayuba, Laishiba otsü sayuba, anogo tenet nu buba nung alui maoba, limapur amongtsümong mamongba dang "arogo" mesura arogo nunger/tamanger ta aja asü? Iba ojang ana terajem angatetsü atema ibala mesukba tesendaktep ojangtemji bushitsüla.

"Rishikangshi", "Metangdangi", "Disband", "Excommunication", "Arogo" (both organized or unorganized),ano aika,item olongtemji tapi agi mopung nungi mesura tazüngla nungi kodanga mepokteter. Langka tatalokba ka aliba ajangang ojangtemji adoker aser ojang shiaji context balala nung tangatetba balala nung amshiba angutsü. Asen lima nunga nungja-koja ajakji tetezü kaka lir, tat. agi, "Ungma", "Chungtia", "Mokokchung", Mopungchuket" etcitem ajak nungji tetezü ka ka lir.Clarker putu, pa masodang kobala tangatetba nung item ojangtemji jembia aruitemji metettsü kanga tongtibang. Iba dangji "World behind the text" ta ajar. Iba angatetsü atema Colonial history and ideology,slavery movement, white poor liberation movement, indigenous movement & doctrine of discovery, women's rights movement,civil rights movement, Protestant theology, evangelical movement aser theology rajema metet nung dang ojang tera, tetezü, kechi nükjidong nung amshi itemji jangja angatetsü. "World behind the author/text" researchertemi metettsü merangtsüla. Tapi agi, "World behind the text" jangja merajemitangar kati ashiba mesura secondary source kar dak ajemdaker pei tebilemba teratet agütsüba jagiotsüji raksatsür aser telok mangmangteper ta angatetdi.

Tanabuba nung, "Words in the Text"(Kaket nungji kechi zülua lir) ya kanga tongtibang. Tezülor jagi, tat.agi pa/la masodangjembia aruba tejen tangatetba dang lephsia ashir asü mesura ojangjikesa dang suaka tangatetba/teratetba tasen ka agütsütsü meranger? Koma meranger? Koba mapang nung, kechi telok dangi, kechi nükjidong nung iba ojangji enoka zülu? Tat. agi, "metangdangi" ta Clarki amshia lira, iba arogo ya "tambu"ta Home Mission pur nem angatetdaktsütsü zülu asü? Molungkimong/Molungyimsenor ABAM nem angatetdaktsütsü zülu asü? America nunger sobaliba nung "tambu" ta asüba ya kanga tongtibang asü? Parnokia tambu ya raktepa aru asü? "Tambu" ta asüba ya parnok sobaliba nunga koma angateter? Aori koma angateter? Aor sobaliba nung ajemdaker tanu suiren ratettsürtemi tali purapujia jembir asü? America nungersobaliba nung "Tambu" ta asüba nungjikechi konang lir? Aor sobaliba nung kechi konang lir? Aori ozü yimer tambu, kidongrongnunga sunga, tebou semchir ana rongnung tambu raktepa shilu, yimpur, ainer ta kechiba yamai konang ka küma jembir? American nungeria asenok Aori angatetba amai angatet asü? Item research questionji asüngdanga suiren zülutsüla.

Kaket nung zülua lir, talisa missionary record nung kechi zülua lir aji "primary source" aseritem ajakji shitak ta bilemer asü? Parnoki tai koda sur zülua yutsütsü? Asenok "white is superior" ta bilemba mulungsentsü aliba ajanga Clarkji Tsüngrem nisung aser paibo aibelena zülua meyutsütsü ta bilemer! Missionary recordji dang shitakba küli asütsü ta angatetba lir asü? Parnoki zülua aliba alema tali bushiloka maotsüla ta bilemer? Indigenous scholartemi zülu alema/atena oa, talisa colonizer, mesura white missionary atena/alema oaresearch agia suiren zülushitsüla ta ashir. Indigenous scholars aikati,asen tesayur Renty Keitzar-ia temesung nunger tenük küli aser parnoki ajangshiba koba zülu dangprimary source ta ajar, ya tabensa masü. Aika lisopur sobaliba mangateti zülua lir. Itemji atener "prime source" lir ta ashir. Tesayur Keitzari ashiba agi, tetsü-tebou nungi nulak songa kazüka yokbatemjia prime source. Ali, tzü, tetsü-tebou otsü koba zülu nung mali, saka asangsang nung angur, jembir, küli sayutsü akok itemji prime source ta ashir. Sura, prime source aser zülua yutsüba primary source tesendaktepji koma amshitsü? Ojang anaji tanu suiren zülur aser teratettsürtemikoma angateter aser rateter? Koma jembia aru/jembir?Molungkimongi koma Rishikangshi aser Metangdangi ta asübaji rateter? Molungyimsenia koma rateter? Researchertemi koma rateter? Kechi nükjidong nung item ojang ana ya tongtibang aküm? Parnoki ratetba nungji historical basis tejangja lir asü masü?"World behind the text" aser "Words in the text" ya koma researchertemi amshia suiren yanglur?

Naga context nung prime sourceji kanga tongtibang ta angateter. Prime source isab nung kong Clarki tenzüka First Baptist Church amenoka tanu tashi noktaka lir? Ali, tzü, arrtsüaser tenük küli agi bendangdaktsüdi. Shir liküm nungi Ao Mungdang, Tetsür, Youth Mungdang, Sunday school, kaket-ken-o renloka kümdaktsü? Ali, tzü, arrtsü, tenük küli ajanga bendangdakjang. Rishikangshi aser Metangdangi ta jembia aruba ajakji prime source denji medemdanga arogo suiren bushidi ta ayongzüker. Tsüngremi tazünger ajak item tasüngdangtem ajanga tangatetba tasen agüjang ta sarasademer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir


Impur nung 'Creative Conference for Children Ministry' sentong agi

Impur, Mongputeni/ October 05 (TYO): ABAM Literature & Education Ministry aser "The Group" India nati longjemer ayongzükba 'The Creative Conference for Children's Ministry' sentong Impur nung October 4, 2023 nü kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka

nung metetdaksü. Iba sentong ya tanurtem ministry kübok Vacation Bible School (VBS) agia aoba mapang tesayuba tajung agütsüba ajanga ministry temaba jenjang nung inyaka aotsü nükla nung agi. VBS nung agitsü lesson tongtibang aika sayua liasü. 2024 küm VBS "SCUBA" The Group India ajanga

tenzükja liasü. Iba sentong nung Arogo 60 nungi Associate Pastor Christian Education-i anir tesayurtem 225 arua shilem agia aden. Arogotem nung iba VBS agia aodang lanur tajung aika adoka asen lima nung temelenshi tulu bener arutsü nükla ayur, ta kasa sangdong ajanga metetdaksü.

India nung tribal Khristan lenir, Telesphore Placidus Toppo süogo



Telesphore Placidus Toppo

October 05, 2023: India nung tribal Khristan lenir aser India nung mezüngbuba tribal cardinal, Telesphore Placidus Toppo-i tribal sensakertem, talisa lisopurtem temeden atema inyaka aru.

Toppo ya taoba mapang Jharkhand kübok Ranchi nung Archbishop liasü.

Pa October 4 nü asü; pa arrshi küm 84 liasü.

Jharkhand state sorkar indang tribal advisory committee nung taoba mapang züngsem, Ratan Tirkey-i, "Taoba mapang putir, bishop aser cardinal-i (Toppo) tribal nisungtem den tera yanga ali aser pai mapang ajak nung lisopurtem temeden kümzüksü atema inyaka aruogo," ta metetdaksü.

2003 küm Toppo ya India nung tribal rongnungi mezüngbuba College of Cardinals nung züngsem aküm.

Pai tribal nisungtem meyong tzü, ali, arem, sobaliba aser sobaliba den maitsü kümzüksü atema inyaka, ta Tirkey-i metetdaksü.

Tribal Oraon nungi Toppo-i Indo-Aryan oshi- Sadri, Hindi, English aser Italian oshitem kanga junga jembiteta liasü.

October 4 nü osangbenertem den jembidang Tirkey-i, Toppo-i Jharkhand tribal lenirtem aser Arogo nung lenirtem ajungkettsütsü atema inyaka, ta metetdaksü.

Toppo ya 1939 küm October 15 nü Chainpur nung aso; iba mapang nungjibo Jharkhand ya Bihar state shilem ka liasü.

India nung nuchiso

manguba mapang nungi tribal nütsüing aika aliba tesemtem ya state ka akümstsü atema takhangba agüja aruba sülen 2000 küm Bihar nungi Jharkhand state alangteta liasü aser state yimtibaji Ranchi shim.

1984 küm Toppo, Ranchi nung archbishop shim aser 2018 küm nung ang pa iba menden nungjagi anisüngzuka liasü. Iba mapang nungji pa arrshi küm 79 liasü.

Pa aluyimer kibong ka nung aso aser par adiani/aianu 9 liasü. Pa lanuwa mapang Belgian Jesuit putirtemisa par yim (Jhargaoon) semdanga liasü aser iba mapang nung pai putir akümstsü teletetba agia liasü.

Pa India aser bendanglen azüngba sülen 1969 küm Basel, Switzerland nung pa putir aküm.

Pa India-i meyipa aruba sülen tesayur inyaka aser Torpa nung aliba St. Joseph's High School nunga principal inyaka.

Pa Dumka diocese nung 1978 nungi 1984 küm tashi Bishop inyaka liasü.

Catholic Bishops' Conference of India (CBCI)-i sangdong ka ajanga, "Pa akümli piyong tribal Khristantem atema tesangwa milen ka ama liasü. Pai kanga meranga inyaka aser pa lenisüba ajanga missionary mapatem ajungkettsü," ta metetdaksü.

Pai 2004 nungi 2008 küm tashi Catholic Bishops' Conference of India (CBCI) nung Tir inyaka aser kümsük anaben Latin rite bishops conference nunga Tir inyaka.

Latin rite conference-i sangdong ka ajanga, sensakertem yaritsü atema Toppo ya Tsüngremi shimtetba hadir ka liasü aser nungdabapurtem aser sensakerem tenzükstsü atema bendanga agütsüba lenir ka liasü, ta metetdaksü.

Vatican-i India nung pa lenisüba tajung reprangteta Council of Cardinals for the Study of Organizational & Economic Affairs of the Holy See nung züngsem shim.

2016 küm Sri Lanka yimtiba, Colombo nung Federation of Asian Bishops' Conferences (FABC) 11buba senden nung Pope Francis-i pa 'special envoy' shima liasü.

Jharkhand nung lokti tenzükba mapa tajung aika inyaka atema 2002 küm Jharkhand sorkari pa nem Jharkhand Ratan (Jewel) award agütsü.

CBCI-i sangdong ka ajanga, Toppo-i asen linük yimsü aser loktiliba nung kodanga maidoktetsü tarak tajung yutsüogo, ta metetdaksü.

"Cardinal Toppo ya asenok ajak atema ajungmesor ka lir. Pa dak aliba shisatsü, tanela aser pai Arogo atema nendaka inyaka baji asenok ajak atema tatishitsü tajung," ta CBCI Tir aser Archbishop Andrews Thazhath-i metetdaksü.

"Pai timtemertem atema inyaka aser yimsü balala amangertem tsüngda tangatetep alitsü aser longjema alitsü atema pai meranga inyaka baji teti bilemtetsü," ta paisa shisem.

ANOGO ABEN TSÜNGREM DEN

Ne Ken Ngutetba

T. Ken 137:1-9

Ne tanelaren tetentangba rongnung kaji na ne ken ka ali asü mali ibaji lir. Ken 137 nungji shirnoki parnok ken sama iba indang ashir. Parnoki aji sama kechiaser parnoki meshitetba mali- parnoki maneni Kibuba anema temenen mena.

Yangi tezülubaji sayur. "Kodang onoki zion bilemtet, Babelon ayong anasa, yangji onok amen, au onoki ajeb. Willow süngdong rongnung onoki kongki itaka ayu. Kechiyong yangji parnoki onok tepuoker küma anir ao, parnoki onok dang ken atentsü asüngdang, aser onok rishikangshiri pelatepang aser, onok dang Zion ken tenyuang ta asüngdang" (t.1-5). Babeloni Yihuda nung jashidaksüba noksaji nai bilemdangang. Yihuda nung langzü, "Bendang lima nung onoki kechi koda Kibuba ken tentetsü?" (t.4).

Ibai inyaksü akok. Parnoki tashi mangaba yong parnok idakji ali, aser parnok ken sama. Saka bendang lima nunga, asenoki Kibuba ken atentsü akok. Kibuba ken atentsü akok. Yisu kotak nungi alimai alu, aser pa ken ka kaa liasü. Shidakba nung pa ashioktsüba aonung nung temaba taktang nung pai ken ka aten (matt. 26:30).

Kodang nai Kibuba den mejajalir. Nai ne ken samar aser tebilemtetbatem nung alitsü tenzükter. "O Yirusalem, ni na amadokra, kü teka tajichi ashirepdakajng. Ni na mebilemtetra; kü tepela tematiba dang taoba ni Yirusalem meyutsüra. Kü temeli kü tawa nung neploka lidakjang (t.5,6). Na tebilembatem alir asü mesüra anogo shia Kibuba nungi temoatsütem agizükter?"

Tekong 7-9 nung Yihuda nungeri mang ayangtsü bilemba angur. Meimchir tsütsü nungi ibai tangatet dang lir. Kechiaser parnoki parnok kinü tanurtem lungma nung ajenset. Anungji parnoki sarasadem, "Kibuba, parnok dak alangba parnok nem agüjang. Na obendanger lir. Nai parnok bilemtetang". Saka Khristan ka ama, asenoki mezüngbuba taidok agütsütsü bilemstsüla.

Nai ne ken samar, tebilemtetbatem nung dang lia mang ayangtsü bilema lira, na Kibuba anasa mejajar. Nai mezüngbuba ne temenen nangzuka samaa aliba kenji ngutetsüla. Tsüngrem ne nem tekümtet tepela agütsütsü.

Khristantem dak metzü metsülöksüba atema Yihuda nung 5 apu

October 05, 2023: Israel nung yimsü alia amanger Yihuda nung kari temeshi aini Yirusalem-i aoer Khristantem dak metzü metsülöksüba video ka social media nung prokshiba sülen police-i Yihuda nung pongu puogo.

Yihuda nung kari Khristantem dak metzü metsülöksüba tatalokba sülen Israel Ato kilonser,

Benjamin Netanyahu densema lenir aikati aitsüogo.

Sangdong ka ajanga Israel Ato kilonser, Netanyahu-i, Yihuda nung kari inyaka mapaji pai sashia aitsür, ta shia aibelenertem anema tekaraba nung inyaksü tetuyuba agüja liasü.

Netanyahu-i, "Tekülemertem anema inyaka baji ozüng alema lir aser tagizüktetla masü. Tekülemertem anema inyaka baji onoki magizüktetsü," ta metetdaksü.

Israel Tir, Isaac Herzog-ia,

"Asen linük nung onoki yimsü balala amanger ajak kümzüksü atema onoki inyaksü, iba denji külemi tesem ajak, yimsü lenirtem aser meimchir ajak tesempa mapa nungi kümzüksü atema inyaksü," ta metetdaksü.

October 3 nü social media nung video ji prokshi aser lenirtemi iba tatalokba aitsüba sülen video nungjia ajemdaker Israel police-i nisung pongu puogo.

Video nungji, temeshi aini aoer bendanger Khristantemji süng agi yangluba Kangki ka bener Tenla kidang nungi ayazüka aluba sülen yimdong süa jajaba mapang nung tanur kar densema Yihuda nung kari Khristantem dak metzü metsülöksür.

Yihuda nung sobaliba nung, metzü metsülöksüba jeni temenen tanela aridoktsü atema lir, ajisüaka anüolen alirtem atemabo iba ya mezüngmeshiba mapa ka lir.

AO OSHI ANGAZÜKDAK: TANÜ ANGAZÜKTSÜBA OJANG



Sangbang

(n) asangur (young man)

* Tsüngremi Aor nem sabang tajung aika moatsüdagi.

Sangpongpi

(n) ninang tapu ka (a kind of bee)

* Sangpongpi agi nisung dak metaker.

OLONG PAITEP # 6658

Grid for Olong Paitep # 6658 with numbers 1-24 and shaded cells.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den kulemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tububa - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak lechira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6657 TELANGZÜBA

TIPIEN :

- 2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA

GRAMMYS AWARD AGIZÜKBA US TIR ASEM:

- * Taoba tir Jimmy Carter-i Best Spoken Word Album category nung Grammy Awards asem nguogo.
* 2004 küm Bill Clinton-i 2003 küm My Life atema Best Spoken Word Album atema Grammy angu.
* Barack Obama-i 2006 küm Dreams from My Father audiobook atema Spoken Word Album angu aser 2008 küm The Audacity of Hope atema Best Spoken Word Album asoshi Grammy ngua liasü.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Sikkim tzümetsüng lendong nung asür 18 jungogo



Gangtok, Mongputeni/October 5 (Agencies): Sikkim nung tzümetsüng tesashi aruba sülen ano tasümgang pezü tashi ngutetogo.

Tasümgang pezü ya Brehostibar (October 5) anepdang nguteta liasü.

Tasümgang asem Singtam nung ngutet aser ano tanga tasümgang ka Sikkim kübok Teesta-VI project site nung nguteta liasü.

Brehostibarnü tasümgang pezü ngutetba sülen iba tsümetsüng lendong nung asür ajak senteper nisung 18 jungogo.

Kasa mapang nung Indian Army-i, tzümetsüng nung samara alir kinungertem atema helpline asem amenoktsüogo. Samar alirtem rongnung sepaitema densema lir.

Samar alir kinungertem atema lapoktsüba Army helpline number asem ya:

Army Helpline No for North Sikkim - 8750887741; Army Helpline for East Sikkim - 8756991895; Army Helpline for missing soldiers - 7588302011 lir.

Sikkim nung awatsüng ka pokdaka ayimba ajanga

tzümetsüng adokdaksüba sülen tang tashi nung nisung 18 asüba osang jangaago.

Kasa mapang nung army 22 densema nisung 102 tang tashi monguteti lir, ta Sikkim sorkar sangdong ka ajanga metetdaksü.

Maneni Army ka kümzüko aser pa temang anepalutsü atema mozükidangi anirogo. Pa temang tajungba lir ta osang ajanga metetdaksüogo.

Tzümetsüng lendong nung samaba army 22 ngutettsü atema bushüstingdang tenzüko, ta source kati metetdaksü.

TTAADC terenlok asoshi Niti Ayog teyari bushitsü: Pradyot

Agartala, Mongputeni/October 5 (Agencies): Tripura Tribal Areas Autonomous District Council (TTAADC) terenlok asoshi Niti Aayog dang teyari meshitsü atema TIPRA party lenir Pradyot Debbarma renema lir.

TTAADC kübok aliba tesemtem terenlok asoshi Niti Ayog dang senotsü teyari meshitsü nükjidong nung Pradyot Debbarma New Delhi-i aotsü.

Tripura chief minister Dr Manik Saha den Bodhbar aonung senden ka amenba sülen Pradyot-i ashiba agi, "ni TTAADC terenlok dak

sendakba nung CM Dr Manik Saha den ajurutepeggo. Tanü ni TTAADC atema Niti Ayog dang senotsü teyari meshitsü atema Delhi-i aotsü."

"Iba senden ya terenlok asoshi dang aser yimden yimsüsüba dak kecha sendaka mali. Ni Delhi nung yimden yimsüsüba dak sendakba nung sensak asemtsü saka state nungbo masütsü," ta pai ashi.

"CM-i kü tebilemba kanga junga agizükogo aser küna kanga tajangzük ka-a sensaksemogo. TTAADC terenlok asoshi tebilemdangba kar benokogo aser pai item ken

o tem asadangtsü ta shiogo. Onoki Chief Minister nem project 100 dak tema agütsüogo. TTAADC nung lenmang yanglutsü atema onoki tang tashi sen crore 1.18 agizüka lir. Ajisüaka km 960 talang lenmang atsülangshitsü atema NHIDCL mesüra PWD teyari nüngdaker. Health care dak sendakba nung ni ambulance telong junga agütsütsü mepeshia asüngdangogo. Itasen atema senotsü karbo agizükogo ajisüaka terenlok maparen atema senotsü teyari talila nüngdaker," ta pai shisem.

2026 küm tashi nungbo Assam nung apu 1000 yanglutsü: CM

Guwahati, Mongputeni/October 5 (Agencies): Assam nung 2026 küm tashi nungbo apu 1000 bo sa yanglutsü.

Iba osang ya Assam chief minister Himanta Biswa Sarma-i Bregostibarnü sangdong ka ajanga metetdaksü.

"2026 küm tashi nungbo Assam nung apu 1000 yanglutsü onok bendanga agütsür lir," ta chief minister Himanta Biswa

Sarma-i ashi. Tamulpur aser Baksa district na sendaktepdaksüba apuba ka semzüksüba sülen Assam CM Himanta Biswa Sarma-i iba osang ya metetdaksü liasü.

"Tamulpur aser Baksa district na tsüngda sen crore 30 intoka yangluba apu yagi senzisenpong mapang shilem 50 agi tajemba kümdaktsütsü," ta CM Himanta Biswa Sarma-i ashi.

Maneni Assam CM-isa, Tamulpur aser Baksa district na tsüngda semzüksü apu tasenba yagi BTR (Bodoland Territorial Region) nung terenlok maparen tekaratiba nung benokyonga aotsü a soshi teyari tulu agütsütsü, ta ashi.

Tamulpur-Baksa apu yagi yimtsüng 12 dak tema nung alir nisung 25,000 dak tema indang indanga ajangzüksü imlar.

Manipur: Imphal West nung ki ana rongtoktsü

Imphal, Mongputeni/October 5 (Agencies): Manipur nung tensa tajungba küma maoer aser Bodhbar aonunga Imphal West district nung ki ana rongtoktsüogo, ta police temi metetdaksü.

Iba lendong ya Patsoi police station kübok New Keithelmanbi tesem nung aonung 10 ako shi nung ataloka liasü.

Police-i ashiba agi, mejangjaba nisungtemi injang

ishika khaloktsür iba tesem nung jena ao. Mi ya security forces aser fire services personnel temi temsepa liasü, ta police-isa metetdaksü.

Iba tatalokba sülen Meitei tetsürtem adenshi, ajisüaka security force temi parnok nokdanga liasü, ta police-isa metetdaksü.

Iba tesemi security talila yokogo aser tensa azüoka lir, ta police-i ashi.

Manipur nung May 3 nü nungi tensa kanga mejungi kümer lir aser tang tashi nung nisung 175 süogo aser nisung 50,000 dak tema pei talidak ki toktsür jenshiogo.

State sorkari ashiba agi, prangbong hadir 4,500 aser injang 650,000 shi samaogo. Manipur police aser security force temi prangbong 1,500 aser injang 15,000 shibo ngutetogo, ta police ketdangtsürtemi metetdaksü.



पेंशन निधि विनियामक एवं विकास प्राधिकरण
PENSION FUND REGULATORY AND DEVELOPMENT AUTHORITY



PENSION FUND REGULATORY AND DEVELOPMENT AUTHORITY

B-14/A, CHHATRAPATI SHIVAJI BHAWAN, QUTAB INSTITUTIONAL AREA,
KATWARIA SARAI, NEW DELHI - 110 016.

PUBLIC NOTICE

NPS-Lite - Swavalamban Scheme kübok pension benefit dak sendakba nung awareneww taliba agütsütsü asoshi subscribers tem dang teküboklen agüja aliba benefit/services tem agitetsü ta metetdaksüogo.


- Point of Presence (PoP)/Aggregator mesüra online ajanga eNPS portal; <https://enps.nsdl.com/eNPS/InitialExistingUser.html> ajanga log in sua küm 60 sülen pension agitsü atema eegular contributions agütsütetsü.
- Arishi küm 18 nungi 40 tsüngda aliba subscriber temi guaranteed pension indang tajangzük agitsü atema Atal Pension Yojan (APY)-i migrate asütsü asoshi bank/post office den tongteprateptetsü.
- Arishi küm 40 tema aliba subscriber temi PoP/Aggregator dangi temepishiba benoka exit sütetsü.
- NPS-Lite account kanga junga achaayangtsü asoshi scheme kübok bank account details, contact details and/or nominee details Update/add/modify sutetsü.
- <https://npslite-nsdi.com/-i> login süa mesüra NPS-Lite mobile App download süa statement of the transaction (SOT) access suang.

Yimlibilema onok indang website semdangang
www.pfrda.org.in or call to toll-free no 1800 110 908
or contact underlying Point of Presence/Aggregator
for complete information or scan the QR code



cbc 15102/121/0004/2324

Mulungnen O



ASO :
15th Sept.
1928

ASÜ :
30th Sept.
2023

Obala asür LITEMJUNGSHI PONGEN (Kinunger), akümüli wadang tempanger onok asükhu agi neneter shisabulua alidang kija, kibong shirnokisa onok den taku marok lemsatepa rongsen, nübu aser sarasadem agi yaritepogo, nenok ajak dang kanga pelar.

Tsüngremi nenok ajak maneni moajang ta ozü sarasadem.

~ Jalatem, Semchirtem, Kidangkimgang.

Uganda opposition lenir Bobi Wine linüki meyipa aruba sülen apu



Bobi Wine

Kampala, Mongputeni/October 5 (Agencies): Uganda nung opposition party tongtiba lenir Bobi Wine bendangleni aoba meyipa aruba sülen puogo, ta pai aniba National Unity Platform (NUP)-i metetdaksü.

Kentener aliba nungi yimden yimsüsür akümsang ya South Africa densema linük ishika semdanga senzüba sülen Bresthibar anepdang Entebbe International Airport tonga aru.

"Onok tir (Bobi Wine) airport nung anenli regime operatives temi apu," ta NUP indang general secretary David Lewis

Rubongoya-i X sabang ajanga metetdaksü.

X sabang nung iba osang den külemi nisung anati pa pur aoba indang noksa ka dena pai lemsatepa liasü.

Iba dak sendakba nung police-i osang kecha magütsü.

Wine pusemertemi pa linük yimtiba Kampala nung par kidangi meiner aotsü asoshi sentong yanglur liasü, saka police-i ashiba agi, iba amala lokti adenshiba ya ozüng alema lir.

"Iba amala procession ajanga gari senzüsenpong nung tetsüdkaksü adokba den

nüburtem senzüsenpong aser Entebbe - Gayaza highway nung shishilemba balala dak tetsüdkaksü adoktsü. Iba ajanga mepetmesü adoktsü akok koba nüburtem, motorist, passenger aser shishilembartem asoshi lendong lir," ta Kampala police otongdar Patrick Onyango-i Bodhbarnü ashi.

Taoba ita Ugandan police-i, linük ajunga nung NUP-i ayongzükka agiba rally tem tenokdangba agütsüogo kechiyong iba ajanga mepetmesü adoktsü akok ta ashi.

Taoba mapang kentener Bobi Wine indang shitakba tenüngbo Robert Kyagulanyi lir aser pa ya tir Yoweri Museveni-i aniba sorkar anemer rongnung tongti ka lir aser pa taoba mapang aiben puogo aser meimchi temeden anema inyangshiba atema dena aitsüogo.

Pa 2021 küm tir election nung Museveni den toktep ajisüaka takok monguteti liasü.

Koinu yipru agi Taiwan kongshi: Nisung 190 yiru

Taipei, Rongjui/September 5 (Agencies): Typhoon Koinu agi Bresthibarnü Taiwan dak kongshia nisung 190 yirutsüogo, ajisüaka nisung asüba osangbo kecha mali. Yipru yagi tzunglu tesashi bener arutsüba den otsüsütsüsa mopung kanga sashia ona liasü aser iba ajanga school aser office tem shibangtsüsa aküm.

Koinu yipru yagi Bresthibarnü Cape Eluanbi dak kongshi aser southern China nung Guangdong aser Fujian province leni aoba mapang tashi maitba akümtsü imlar.

Yipru yagi Bodhbar aonung tang tashi nung Taiwan nung mopung takaratiba bener aruja liasü. Orchid asetkong nung weather monitoring station-i aonung 9:53 nung mopung

342.7 kph (212.9 mph) aonba asatetogo aser iba den 9:40 nung sustained winds 198.7 kph (123.5 kph) atongba asatetogo.

1897 küm nungi tang tashi nung Taiwan nung mopung speed mangaoka aruba rongnung tang ya takaratiba ona liasü, ta Central Weather Administration indang Taitung Weather Station tekolakba Huang Chia-mei-i ashi.

Wind speeds asadanga denga mapang tatsüka dang lir raksa liasü, ta Huang-i ashi.

Bresthibarnü Koinu yipru indang maximum sustained winds speed ji 155 kph (96 mph) aser gusts 191 kph (119 mph) liasü.

Kasa mapang nung anütoklen tsüküm nung aliba Taitung aser Hualien county

aser anüoletip nung Pingtung county nung tzunglu tesashitiba arua liasü.

Asetkong kübok Kaohsiung yimti densema yimitem nung school aser office tem shibanga liasü. Linük yimtiba Taipei nungbo akhi ama mapatem inyangshio agi aser Bresthibar anepdang tashi nungbo tzunglu anener liasü.

Taiwan indang fire department-i nisung 190 yiruba metetdaksüogo. Yirurtem ya timba Taichung, Tainan aser Kaohsiung yimitem nungi liasü.

Maneni yipru aitba ajanga domestic aser international tayimtsütem aika thiogo, ta transportation ministry-i metetdaksüba rong tem senzüsenponga tenokdangba agütsür liasü, ta shisem.

OFFICE OF THE MANGMETONG YIMPANG PONGENER KIDONG TELONGJEM KOHIMA KOHIMA : 797001, NAGALAND TENÜNGSANG AGÜTSÜR

Mr Chubameren Pongen & Mrs R. Awala Aier tena jabaso

- Er. Yimkumwati Pongen, Executive Engineer.
- Shri. Imlikokba Pongen, UBSI.

Tena promotion ngua kidong nem tenüng tajung bener arutsüba atema tenüngsang agütsür.

Tsüngremi nena wadang maneni moajang ta sarasademtsür.

Sd/-

President, MYPKTK

Sd/-

General Secretary, MYPKTK

US-i Ukraine nem injang million 1.1 agütsü

Washington, Mongputeni/October 5 (Agencies): US-i taoba küm Iran ket nungi apuba injang million 1.1 shi Ukraine dangi yokogo, ta military sangdong ka ajanga metetdaksü.

US Central Command (Centcom) shirnoki Middle East nung inyakymtem achayanger parnoki ashiba agi, injangtem ya December ita Yemen-i oya aliba rong ka nung pua liasü.

Ukraine nem teyari agütsüba anüolen aliba linüktemi Ukraine-i injang amshiba peritsütsü asoshi parnok indang production line tem timtema arudar, ta shiogo.

Centcom-i ashiba agi, Iran nung indang injang ya Ukraine nem Hombarnü agütsüogo.

Parnokisa, injang ya 7.62mm caliber injangtem liasü, koba Soviet-era rifle aser light machine-guns tem nung amshir.

Tangatsübo injang aika agütsü amai, ajisüaka Ukraine den sendaktepa aliba linük temi injang million noklang aika agütsüba asadanga iba ya shilem tila ka dang lir.

US-i tang tashi nung injang aser grenade million 200 dak tema agütsüogo.

Iran nung indang injang ya US naval forces-i MARWAN ta nungja agütsür aliba rong ka nungi December 9 nü pua liasü, ta Centcom-i metetdaksü.

US sorkari civil forfeiture ta ser inyakym ka ajanga July ita iba injang ya parnok meyong

kümdakja liasü. Iba inyakym kübok kibur ya temzüng ozüng raksaba inyakym nung densema lir ta bilemra pa/la indang oset pua yutetsü.

Iba ken o nung Iran indang Islamic Revolutionary Guard Corps densema liasü. IRGC ya Iran indang armed forces kongsang ka lir.

Centcom-i sangdong ka ajanga ashiba agi, iba tesem nung Iran-i tasüba bener arutsütsüsa tangar nem teyari agütsüba temzüng ozüng dak ajemdaker nokdangtsü asoshi onok den sendaktepa aliba linük aser teloktem den longjemer inyaksü US bendanga agütsür lir.

Yemen nung tang civil war adoker aliba nung Iran-i Houthi telok pusema arudar, ajisüaka iba telok nem prangbong injang agütsütsüba ya 2015 küm UN Security Council bangzüng ka agi tenokdangba agütsür lir.

2014 küm Houthis teloki linük yimtiba Sanaa atsünga linük sorkar atsüngtokba sülen Yemen nung civil war tenzüka liasü.

Iba teloki atsüngtokba sorkar ya Yemen nung alima kintemi agizükba sorkar lir aser parnok nem Saudi-i aniba telok kati teyari agütsüba den US aser UK natia teyari agüja arudar.

Taoba küm tom ka nungi Russia nem Ukraine rara nung amshitsü atema hadir balala agütsüba aser talisa drone tem agütsüba atema Iran aija arudar.

(Maneni tapak 8 nung...)

NSF Trophy: New Market Football Club semifinal-i iogo

Kohima, Mongputeni/October 5 (TYO): 23buba NSF Martyrs' Memorial Trophy nung Brehostibarnü Defending champions New Market Football Club-i A Yhome FC koka semifinal-i iogo.

Brehostibarnü mezüngbuba quarter final asaya nung New Market FC-i gola 2-0 agi A

Yhome FC madak takok ngua liasü. Asaya mezüngbuba shilem nungbo team kati danga goal magütsüti asaya liasü.

Ajisüaka asaya tanabuba shilem nung New Market FC atema Peteviso Kezieo-i (11) minute 51buba mezüngbuba goal idaktsü aser Khiuwangbo Kaurintah-i (8) minute 67buba nung tanabuba goal idakja

parnoki asaya koka liasü.

Iba asaya atema Khiuwangbo Kaurintah nem man of the match naroküm agüja liasü. Iba asaya nung ASU General Secretary aser taoba AYO tir, match patron liasü aser pai iba naroküm agüja liasü.

October 5 nü asaya: End of Era vs Liangmai FC.

Asian Games: India nunger asayartemi gold medal 3 angu

Mongputeni/October 5, 2023 (Agencies): Brehostibarnü Asian Games nng India nunger squash asayar Dipika Pallikal aser Harinder Pal Singh Sandhu nati tarep temeyoktep asaya nung gold medal nguogo.

India nunger tarep yagi 11-10 11-10 agi Malaysia nunger tarep Aifa Binti Azman aser Mohammad Syafiq Bin Mohd Kamal na koka liasü. Final asaya minute 35 asaya liasü.

Kasa mapang nung India tetsür compound team-i final asaya nung point ka agi Chinese Taipei team koka gold medal nguogo.

Top-seeded aser reigning world champion Jyothi Surekha

Vennam, Aditi Swami aser Parneet Kaur nungeri point 60 angutsü aliba nung 60 ngua third-seeded team ya 230-229 agi koka liasü.

Jyothi aser Ojas Deotale nati Bodhbarnü tarep temeyoktep asaya nung gold medal anguba sülen taküm Asian Games nung India nunger asayartemi ano gold medal ka nguogo.

Bodhbarnüsa India nunger tebur compound team-i gold medal ka nguogo. Team nung Ojas Pravin Deotale, Abhishek Verma, aser Prathamesh Samadhan Jawkar nunger densema liasü.

Par aseme final nung kanga junga asaya South Korea nunger asayar Jaehoon Joo,

Jaewon Yang, aser Jongho Kim nunger 235-230 agi koka liasü.

Kasa asaya semifinal nunga India team-i Chinese Taipei nunger asayar Cheng-Wei Chang, Chieh-Lun Chen, aser Cheng-Jui Yang nunger 235-224 agi koka liasü.

2014 küm Incheon nung India nunger archer temi gold ka, silver ka aser bronze ka ngua liasü saka taküm parnoki tajungba asayateta gold-a asem tashi nguogo.

Maneni tebur compound kija asaya nung Deotale aser Verma na final asayatsü ali nung kechi südir süaka medal ana angutsü aser tetsür compound asaya nunga Jyothi final tonger asünung silver bosa angutsü.

China Open: Coco Gauff Quarterfinals-i iogo



Mongputeni/October 5, 2023 (Agencies): Beijing nung Brehostibarnü China Open nung US Open champion Coco Gauff-i Russia tsür Veronika Kudermetova koka quarterfinals-i iogo.

World number 3 asayar yagi 7-6 (7/5), 6-2 agi Veronika

madak takok angu aser la quarter nung Greece tsür Maria Sakkari mesüra China tsür Wang Xinyu na den asayatsü.

Asaya mezüngbuba set nung Gauff 3-0 agi tejakdang liasü ajisüaka Kudermetova-i la menepa atu aser Veronika nem asaya mekokdaktsüsi atema set point pezü tashi kümzüksüsa aküm.

Ajisüaka world number 16 asayar yagi double-fault ka menaba sülen tie-break nung Gauff-i set ka rakzüka asaya akok.

Tanabuba set yabo Gauff-i amokbanger asaya aser lai serve ana tashi break süa asaya ayong ayonga koka liasü.

Kasa asayamung nung

world number 10 asayar Caroline Garcia-i 6-3, 6-2 agi Ukraine tsür Anhelina Kalinina koka quarterfinal tongtetogo.

La taruba asaya Iga Swiatek den asayatsü shibai Bodhbarnü külem Poland tsür Magda Linette kokogo.

China Open ya 2019 küm sülen tang mezüngbuba ayongzüka asayadar. Beijing-i Covid-19 dak sendakba nung tenokdangba tesashi agütsüba ajanga iba asayamung masayai aruogo.

Teburtem asayamung Bodhbarnü tembangogo. Teburtem kija asaya final nung Italy nunger asayar Jannik Sinner-i World number 3 asayar Daniil Medvedev koka liasü.

US-i Ukraine nem injang...

Kyiv nem maneni prangbong injang aser hadir balala agütsüsi asoshi anüolen aliba linüktem nung tebilemstü adokba mapang tang Ukraine nem iba injang agütsüogo.

Hombarnü Nato indang military committee mendenbuba Adm Rob Bauer-i Warsaw Security Forum nung "barrel ponglang ngudar," ta ashi.

Paisa, küm aika senotsü mintoki aruba ajanga rara tenzüka mapang nunga Nato linüktem nung injang bendena aliba tesadang dang mesüra iba dang nungi ishiba liasü, ta ashi.

"Küm 30 tsüngda asenok indang liberal economy a lenla aika asoshi teperi, ajisüaka rara tenzüker aliba mapang ka nung

armed force atema teperi masü," ta pai ashi.

Paisa, sorkar aser prangbong injang yanglurtemi tang dang nungi takaraba prangbong aser injangtem yanglutsü nungdaker, ta ashi.

Kasa mapang nung UK Defence Minister James Heappey-i Nato allies tem dang parnok indang national income shilem ana defence nung intoktsü mepeshia metetdaktsüogo, koba bloc ajungai agizükogo saka züngse 31 nungi 11-i dang taküm küm benoka inyaksangshitsü imlar.

Congress nung opposition temi Ukraine nem teyari agütsüba atema ashishiba ajanga Biden administration-i

(Tapak 7 nungi...)

tanga lenmang ka bushia aliba mapang ka nung tang Iran indang injangtem ya agütsüogo.

Maneni US nunga ketdangsurtemi joko hopta ishika Ukraine nem lezmükja aliba sen tatemir dang lir ta shia arudar, ajisüaka Republican züngsemtemi nongshiba ajanga House of Representatives-i senotsü talila agütsüsi atema magizüktemi arudar.

Mongolbarnü kasa züngsemtem kari House Speaker Kevin McCarthy atsingtokogo, aser iba ajanga teyari agütsüsi atema vote agütsü asoshi mapang atsülangtsü, kechiyong menden ya taruba hopta-ang melenteptsü.

2buba MS Ahluwalia Memorial 3x3 Basketball Tournament ayonger

Dimapur, Mongputeni/October 5 (TYO): 2buba MS Ahluwalia Memorial 3x3 Basketball Tournament October 26 nungi 28 tashi JV Foundation Basketball Court, Signal Angami, Dimapur nung asayatsü.

Iba asayamung ya Dimapur District Basketball Association aser Nagaland Basketball Association longjemer ayongzüka asayatsü. Iba asayamung ya tetsür aser tebur naprongla atema asütsü. Iba league ya league-cum-knockout basis nung asayatsü.

Asayamung akokba team nem senpet sen 30000 aser Runners Up nem senpet sen 15000 agütsüsi. Kasa mapang nung MVP nem senpet sen 5000 den kuli kaket agütsüsi.

Asayamung nung shilem

agütsü atema taa sen 2000 asütsü aser registration atema tatembangbuba anogoji October 20 asütsü.

FIBA 3x3 regulations kübok team nung asayartem ajak confirmation anogo nung temsüa alitsüla, tetezü parnok FIBA 3x3 digital platform <https://play.fiba3x3.com> nung züngoksema alitsüla. Iba inyakyim atema NBA-i lenmang sayutsü saka registration atema asayar ajak indang personal email address nungdaker, anungji asayar ajak dang pei tenüng züngoksemsü atema metetdaktsüogo.

Registration atema team temi item number; 9864034256, 98625 47901, 70859 94276 nung tongteprateptetsü, ta DDBA tir Sentiningsang Longkumer-i sangdong ka ajanga metetdaktsü.

2023 World Cup ya ni asoshi tatembangbuba asütsü akok: Ashwin



Mongputeni/October 5 (Agencies): India nunger cricket asayar tejen Ravichandran Ashwin-i ashiba agi, taruba ODI World Cup ya pa asoshi WC nung India tenüng nungi asayaba tatembangbuba asütsü akok.

All-rounder Axar Patel yiruba ajanga Ashwin ya pa melena India team nung züngoksema liasü. Arishi küm 37 taina asayar yagi tawa Australia den asayaba asayamung nung kanga junga asayaogo. "Iba World Cup ya ni asoshi India tenüng nungi tatembangbuba World Cup asütsü akok, anungji asayamung jangradema asayatsübaji ajak dang tongtibangtiba lir," ta Ashwin-i Star Sports dang ashi.

"Ni team nung züngoksemsü ta imla maliasü, ajisüaka tia tensa ajanga ni team nung züngoksemogo aser team achayangertemi kü dak tamang katetogo," ta India

team nung züngoksema indang jembiba mapang Ashwin-i ashi.

Ashwin-i World Cup nung India team nungi asayar 10 nung shilem agiogo aser pa tatemsa 2015 küm World Cup nung asaya liasü.

Pai World Cup nung Wicket 17 agia lir. Pa indang average ji 24.88 aser economy rate 4.36 lir. Pa asoshi figure tajungtibaji 4/25 lir.

Virat Kohli dak alia 2011 küm World Cup akokba team nung tang World Cup atema atema shimer aliba asayartem rongnung Ashwin kija lir.

Ashwin-i ashiba agi Pressure azioktsü atema tasak asütsü. "Ni inyaktetsüba ajak agi ball anatsülen mangadaktsütsüba dang asütsü aser aji ni inyaktetsü ta bilemer. Iba asayamung nung pressure koktettsüji ajak dang tongtibangba asütsü aser iba ajanga asayamung azioktsü," ta pai ashi.

BILEMDANGANG

"Merangdang asoshi tamakoktsü kecha mali."